

未快眼福先飽眼福矣。

三點謁省教育廳。廳長夏敬觀先生和藹可親。循々古君子也。並派富科長光年於參觀各校時。指導一切。三時半參觀省教育會。幹事葉聯芳先生接見。因予等名片下。除菊似外。所註貫籍。皆福建泉州。葉君與予等操鄉談。予等異而問之。始知葉君爲平陽縣人。平陽一縣。半操泉州鄉音。蓋其始祖。自泉州而福鼎。而平陽。數十世相傳。言語習俗。猶守舊來家風。不與本地人同化。予斯時想夫娶菲女之華僑。所生子女。大抵能操幾句不規則華語。再傳而後。則數典忘祖。且學胡語罵漢人。雖由子孫同化異族。亦父祖家法不立。有以致之。

文

藝

◎故吳先生鏡秋弔詞

林燕臣

先生官章應澄。尊字鏡秋。原籍臺南人也。少時天

資明敏。舉力異常。師傅親朋。每視爲雞羣之鶴。人中之驥。蓋援筆成錦繡。咸稱學業之精通。出言有文章。堪羨天才之敏捷。而且襟懷舒暢。口如懸河。有識者於此。莫不刮目以相看。迨前清己丑年。一經縣考。屢試屢中。及放榜而冠首榮名。謂之青錢萬選。誰曰不宜。是年六月間。果蒙督憲取進。樂泮水而詠采芹。選拔爲優秀文士。嗣後癸巳。又補廩膳生。方冀鹿鳴飲燕。望仙桂之高攀。鵝薦恩榮。取青紫如拾芥。不料時與願違。易朝兮而衣冠異昔。則曩者之功名。竟付之流水而灰心矣。是以十餘年來。設家塾而垂絳帳。受業者實繁有徒。迨至大正五年四月。受聘爲臺南基督教中學西賓。又同九年四月。兼任教授臺南師範學校。想其數年來衣鉢真傳。克盡厥職。桃李稱滿門之盛。沾時雨而訟作人。譽髦有斯士之歌。坐春風而造小子。先生際此佳境。得英才而教育之。其樂也何如。正厚望先生。克享遐齡。栽培諸後生。達材成德。貢獻社會服務國家。何期天道無親。壽元有限。竟於大正十四年四月二十五日。腦病突如其来。殉職於師範學校講室。享壽五十八歲。雖曰年近花甲。壽數未可謂非長。而遺下寡婦孤兒。未能滋培諸子。至於

功成名就。況家計素本困難。際此中途謝世。亦先生身後之遺憾也。幸得哲嗣金川君。天質聰明。克紹箕裘。父作又兼子述。他日大器克成。未始不可慰先生於地下也。茲值執紳之期僕等不禁撰此俚詞以弔之。嗚呼哲人萎矣。梁木頽矣。嘆人生之若夢。觀家道之淒涼。望琴書之長寂。想笑貌而難忘。典型從此凋謝。絳帳不過空張。聞妻兒之哭泣。旣目擊而心傷。無數後生小子。徒外望夫宮牆。猶幸賢人數百。得秘授而流芳。更有衆賢令子。恢先緒而克強。先生知而受感。沒世亦有餘光。

同

上

林 茂 生

時維大正十四年五月三日。謹爲長老教中學代表。敬告於鏡秋吳先生之靈曰。先生以天縱之聰明。具雄偉之姿質。學問淵博。舌辯如流。少時則擢高科。登顯仕。名冠一時。光被閭里。先生自幼失怙。事寡母以孝聞。兼之待人以誠。接物以敬。鄉黨咸師事之。改隸以來。先生設帳授徒。遊斯門者不分男女多以學德稱於世。大正五年春先生就聘本校。教授漢文九載於

茲。循々善誘。愛諸生若己子。舉凡執經問難者。莫不如坐春風而沾化雨。客年冬先生抱恙沉重。學校驚愕。虔祈勿藥有喜。疾稍愈。先生不忍諸生停課。荒怠勉強。扶病上學。其勤於教務有如此之熱且誠也。爾來月餘。先生顏容憔悴。不似昔日之豐饒。諸僚友多抱隱憂。方企先生此後靜養。復其本然。長爲貢獻於漢文教育界。何圖天不假年。於客月二十五日昏睡教壇。一蹶不起。不數小時。而哲人萎矣。嗚呼痛哉。先生有丈夫子二。長攻商業。次學二中。雖繼志述事。後起有人。然皆未畢其業。先生奚遽遺此而長逝耶。嗚呼痛哉。先生守身廉潔。不多貯蓄。一家八口之養。唯先生是賴。先生奚遽遺此而長逝耶。嗚呼痛哉。我臺學界耆宿。日漸凋謝。本校之漢學命脈。正望先生保存一綫。先生奚遽遺此而長逝耶。嗚呼痛哉。我輩後學得親出函。尤希誘掖提撕。共事學界。先生奚遽遺此而長逝耶。嗚呼痛哉。先生在我校多年。於基督教之精神。不無耳濡目染。然未表明何等信仰。先生奚遽遺此而長逝耶。嗚呼痛哉。雖然古人云死生亦大矣。丈夫處世得與其職務相終始。死有餘榮。先生年近耳順。銳意教育。得殉職於教壇之上。何異乎忠烈